



Festa Corpus Christi

Halo ida ne'e
hodi hanoin Ha'u...

Reflesaun ba Corpus Christi (Anno B)

Jesus dehan ba nia eskolante sira: "...halo ida ne'e hodi hanoin Ha'u...." (Lk 22,19); memoria ida nebe la hanoin deit iha ulun, maibe iha potencialidade domin agradelementu nian no fidelidade ne'ebe husi presente Kristu Nia an rasik.

Iha Kinta feira molok Nia mate Jesus han hamutuk ikus nian ho Ninia dixepulu sira. Iha kalan ne'e, sai sasin kredivel ba jestu domin Maromak Oan mane nian, hodi fo aihan ho Ninia isin rasik liuhusi paun ne'ebe transforma ba nia isin no kalis tua nian transforma ba nia ran hodi fahe ba ema barak: ba fetu no mane iha tempu no kultura oinoin ne'ebe hamrook ba Maromak Nia domin.

Ita hanoin hikas fali hodi celebra ho solene eventu Kristu Nia Futar Isin no Ran.

Iha Tempo Ordinario primeira solenidade iha Kreda nian mak celebra Kristu Nia Futar Isin no Ran: presente Eukaristia, Kristo halo an ba paun hodi fo han ba ita nia moris ne'ebe kontinua ofere se nia ran mai ita ba ema hotu nia salvasaun no ba ita ida-idak.

Presente Jesus Nia an rasik iha Eukaristia mak momentu central iha Kristu Nia Moris, no tempu hanesan nudar eventu fundamental iha komunidadade Kristaun nian no ba fiarnain ida-idak.

Iha narasaun Evanjelista sira nian, ita bele hetan iha Evanjello Joao nian koalia konaba jestu estupenda fase ain nian (Jo 13,1-35), sinal no revelasaun domin rohan laek ne'ebe hatudu Aman Nia domin hodi serbi ema seluk; infaktu, fase ain signifika purifikasaun husi sala ne'ebe taka netik dalan ema nian ba Maromak; nune'e, Nia rasik, iha Nia Oan Jesus, hakruuk iha jestu ida ne'e nian, halo ita nia ain-hakat sira sai livre no dehan ba ita ida-idak, se hola parte ba Jesus, tenke mos buka atu hakruuk hodi serbi ema seluk. Serbisu ne'ebe mak testimonianza ba fiar no domin nian.

Ohin liturjia oferese mai ita konaba narasaun Instituisaun Eukaristia nian, foti husi Evanjello Sao Markus nian: *iha loron uluk festa Azimos nian, katak iha loron ne'ebe ema Judeu sira oho bibi-oan Paskua nian, Jesus Nia eskolante sira husu ba Nia: "Nai, Ita hakarak ami hadia sasan atu han Paskua, iha los nebe?"*.

Jesus iha Jerusalem ho ninia dixepulu sira no repete ritu antigu nian ne'ebe fo hanoin fila fali libertasaun povu Israel husi atan; iha fatin boot atu han kalan hamutuk, *"fatin ida iha andar leten, ho sasan hotu pronto kedas ona"*, Evanjelista sira fo narasaun detaliadu, iha paun laiha ferment no kalis sira ba bensaun nian, buat hotu usa ritual; maibe iha jestu solene no familiar ida ne'e, atu bele harahun buat ruma ne'ebe foun. *Bainhira han hela nia foti paun, silu hodi fahe ba Nia eskolante sira dehan "simu ba hotu hotu han ne'e hau nia isin....." hafoin Nia foti kalis hodi harohan no agradese no fahe ba eskolante sira, "simu ba hotu-hotu hemu Ida ne'e mak hau nia isin halo ida ne'e hodi hanoin hau."*

Ita la hatene reasaun dixepulu sira nian, karik sira ladun komprende liafuan sira ne'ebe Jesus dehan, iha kalis ne'ebe nia fakar mak nia an rasik, Mestre, Kristu, ne'ebe depois de resureisaun sei konese Nia nu'udar sira Nia Maromak no Nai.

Iha han kalan ne'e, nudar simbol fraternidade no komunaun nian, han kalan ne'ebe husu sakrifisiu antigu no antesipa sakrifisiu foun, nebe husi Maromak liuhusi Nia Oan Jesus husi Nazare, Kristu.

Jestu ida ne'ebe uniku no foun, ne'ebe mai husi fidelidade ritu antigu nian ne'ebe celebra aliansa, hanesan iha primeira Leitura dehan: *"Moises sei dadersan hela, Nia hari tiha altar ida iha foho hun, hari mos fatuk sanulu resin rua ba uma kain sanulu resin rua Israel nian. Hafoin Moises haruka mane klosan sira Israel nian balun atu ba halo sakrifisiu, oho karau hasa'e ba Maromak, atu bele hetan damen. Moises simu tiha ran balun iha sanan ida, balu, nia fui iha altar leten. Tuir fali, Moises foti livro Moruk nian, hodi le ba povu. Povu hatan: "Ami sei halo tuir Maromak nia liafuan tomak. Ami sei obedese nafatin Maromak". Nune'e, Moises foti ran hodi hisik ba povu dehan: "Ne'e, ran Moruk nian, katak, Moruk ne'ebe Nai Maromak hemu ona ho imi, tuir liafuan hirak ne'e hotu.!"*

Jestu profetiku ida ne'e fo hanoin konaba Ultima Ceia Jesus nian ho ninia dixipulu sira: sinal ne'ebe labele konfonde ho aliansa domin foun nian, aliansa komunaun nian neebe halo ema sai ida deit ho Kristu no iha tempu hanesan halo ita sai sasin no anunsidor/a salvasaun nian: Profeta ida Reinu nian.

Ita para oituan hodi reflète no konsidera Jesus Nia Liafuan iha Ultima Ceia Paskua nian: *"«Imi simu ba: "ne'e Hau nia Isin". Tuir fali, Jesus foti calis ida, fo agradese ba Maromak, hodi lolo ba sira. Sira hotu simu hodi hemu, Jesus Lia tun ba sira dehan: "Ne'e Hau nia Ran". Ran moruk foun nian ne'ebe sei nakfakar tamba ema lubun boot. Hau dehan loos kedas ba imi: Hau sei la hemu husi uvas fuan, to'o loron ne'ebe Hau sei hemu tua foun, iha Maromak Nia Reinu»"*. Liafuan badak deit maibe iha vokasaun loose ma ida-idak nian ne'ebe simu bolun atu halo komunaun ho Maromak iha Oan Jesus; liafuan ne'ebe iha tempu hanesan konaba projeitu misaun nian ida iha ne'ebe Kristu rasik ba atu haklaken iha mundu tomak Maromak Nia Reinu.

T. Radcliffe, Padre Domenikanu ida, dehan katak testu São Markus nian iha diferensia oitua konaba “paun no tua; Paun ne’ebe fo ba dixipulu sira, ba comunidade kiik ne’ebe iha iha Cenakulu laran atu celebra Festa Paskua; maibe calis ne’ebe dehan atu fakar ba “ema hotu” lori ba cenakulu atu haruka ba dicepulu nain sanulu resin 12, ba ema fiarnain sira, ba ema hotu ne’ebe hein roman salvasaun nian, lialoos, no paz salvasaun.

Mestre nia hakarak mak: *«Hau sei la hemu tan tua ida ne’e to’o bainhira Hau sei hemu buat foun iha Reinu Maromak nian.»*

Nune’e, hodi celebra, kontempla, adora, simu Paun no Tua, ita simu no halo tuir Kristu Nia hakarak basiforma ita atu sai bibi-luhan ida deit iha Bibi-atan ida deit nia okos.

Jesus kompara Nia an hanesan Bibi-Atan diak, Jesus dehan: *“Ha’u fo Ha’u Nia moris bah au nia bibi sira. No hau iha bibi sira ne’ebe la hola parte iha ne’e; sira ne’e mos hau sei gia, no sira sei rona Hau nia lian no sira sei bibiluhan ida deit no bibi-atan ida deit”* (Jo 10,16).

Oras ne’e, husu ba ita ne’ebe sai Ninia dixipulu, ita ne’ebe simu kbiit husi Eukaristia, halo atu lian justicia nian ne’ebe salva, sira ne’ebe sei hadook an husi Kristu, uniku redentora mundu nian, dalan seguru atu salva sira ne’ebe sei hadook an husi Kristu, uniku Maksoin ema nian, dalan seguru ba salvasaun nian, Maromak Nia Oan Mane no liuhusi Nia ita hotu iha Maromak ida deit no Aman ida deit. **(LG)**